

長文襄公自定年譜

道光二年壬午六十五歲

正月初七日奉

上諭直隸總督顏檢未到任以前著長齡前往署理

欽此

十一日抵保定省接印任事

十五日起程叩謁

昌陵

十七日回省具

奏遵化州地方民居稠密案件殷繁應添設理事

通判一員以資彈壓其州同一缺本屬閑曹堪以改抵奉

上諭著照所議將該處州同改爲遵化州理事通判簡用要缺欽此

二十七日奉

上諭河北插帳之循化等處九族野番及鹽池一帶挖鹽番戶均狡黠背約抗不回巢又蘊依雙勿兩族勾結循貴及四川野番盤踞搶掠著長齡卽行馳驛回任設法驅逐相機辦理總須熟籌妥計欽

此

二十九日交卸起程

二月二十八日抵蘭州省接受陝甘總督印務  
上奏報三月初二日卽赴西寧奉

批諭相機妥速辦理面諭留心查看之言毋忘欽此

三月初一日

奏謝

京察議敘奉

硃批口外春寒隨時自重欽此

十三日具

奏行抵西寧會晤松廷連日差探野番情形尙在  
黃河以北背約遷延名爲貪戀水草實圖便於  
搶掠如不示以兵威嚴加懲創日久擾及內地  
邊界殊屬不成事體若非分途兜剿更慮其乘  
間遠遁轉致辦理稽延糜費糧餉臣等籌商調  
派督標及附近各提鎮屬官兵八千餘員名緊  
顧東西北三面分途并進一面移咨四川督臣  
蔣攸銑於路通蜀藏處預爲防範奉

上諭著照所請辦理惟當相機審度籌及萬全該野番如敢恃衆抗拒卽當督率官兵痛勦俾野番咸知儆惕欽此

閏三月初十日具

奏督率續到官兵於閏三月初十日自丹噶爾出口由青海東北前進相機合勦

二十一日具

奏臣於閏三月二十日營次助勒蓋派兵勦捕據副將丁永安稟報於十四日行至烏爾圖打巴

罕拏獲汪什代克族賊探沙拉布羅布藏二名  
訊悉剛咱族番賊約會汪什代克族在托里合  
夥分爲兩股一股與官兵打仗一股趕畜逃竄  
游擊沙武德等帶兵馳赴托里截擊該副將等  
躡蹤追捕十五日酉刻趕至沙拉克里番賊猝  
不及防立時殺死八十餘人活捉二十三名游  
擊沙武德等趕至托里南山番賊佔率山梁放  
槍抗拒官兵槍礮轟擊分路直上殲斃五十餘  
賊擒獲受傷賊四名該副將等趕至鹽池兩路

官兵會合偵蹤緝捕查番賊趨向皆往西南自  
係會合抗拒之意亟應分途勦捕現派總兵穆  
蘭岱督兵由貢額爾蓋向特們他拉克克烏蘇  
一路進勦臣卽接續相機策應奉  
硃批所辦好相機進勦務期迅速肅事欽此

四月初三日具

奏二十二日効力武舉童彥士途遇番賊卽率兵  
役直前追捕殺斃十六名二十四日千總米勲  
等帶兵至察支塔爾有賊騎馬持械而來該弁



等施放槍礮擊斃三十餘賊二十六日總兵穆  
蘭岱帶領官兵趕抵克克烏蘇是夜大雪分兩  
路進兵二十七日黎明俱抵賊巢殺斃三百餘  
人生擒二十六名二十八日總兵馬騰龍率兵  
由押馬圖進發總兵多隆武率兵由烏化圖進  
發兩路官兵行至博洛托亥地方與賊接仗槍  
礮齊施殲斃一百數十名臣於四月初一日營  
次庫什圖差探番賊向南逃竄隨派叅將蔡文  
瑾等帶兵前敵臣督兵繼進初一日黎明齊抵

碩敦納木賊衆登山抗拒該叅將身先士卒率  
兵仰攻臣督兵接續自辰至申殲斃三百餘賊  
生擒烏勒等三十七名餘賊向雪山逃遁臣督  
兵自東北趕至青海西南提督齊慎等緊顧西  
北前進野番鍋帳全行拋棄勢已窮蹙臣督飭  
趕緊勦捕不予以暇務冀尅期蕆事

同日

奏臣身子甚爲結實督兵趕緊勦辦奉

硃批朕心甚喜又奉

批諭看來番賊勢已窮蹙指日可以蕲事朕心慰矣

欽此

同日奉

硃批覽悉官兵連獲勝仗調度甚屬妥協朕心欣慰

欽此

同日奉

上諭長齡等奏官兵進剿番賊連獲勝仗著賞給長齡壽字松石翎管一個四喜白玉搬指一個黃辮大荷包一對小荷包四個以示嘉獎欽此

十三日具

奏總兵多隆武馬騰龍初三日趕至烏蘭哈達地方追及賊蹤野番據險放槍該鎮等分兵步行直上番賊捨死抵拒適游擊萬彪五保都司楊模帶兵趕到併力攻擊殲斃八九十人番賊敗走落巖跌斃者甚多生擒完底等二十七名游擊萬彪等帶兵仍隨提督齊慎進剿初五日三鼓追至喇凍雪嶺夜襲賊營殲斃一百七十八人餘賊深入雪山逃散副將丁永安叅將銜游

擊劉印景探明幫隴山中藏匿番賊一股該處  
路徑崎嶇馬騾難進裏糧前往四月初三日已  
刻趕至幫隴賊見兵到奔上懸崖放槍拒抵該  
員等督兵齊登對峙山梁用礮攻擊連斃數十  
餘人賊始潰奔我兵追殺三十餘里殲斃九十  
餘人拏獲受傷活賊二名臣等竊慮打散之賊  
向西奔竄飭令緊顧西北截擊一面知會提督  
齊慎移師南來據探番賊數百人藏匿哈吸格  
地方初八日二更發兵初九日辰刻行至該處

賊衆佔據山梁恃險放槍派游擊五保存住都司王元守備陳貴等帶兵由山左搶上派叅將徐華清游擊馬鳴謙都司楊模守備玉慶等帶兵由山右搶上該提督親率游擊萬彪都司史臣唐大德等直衝山梁三路官兵槍礮齊發擊斃二百數十人餘賊拋棄什物向黃河沿狂奔官兵緊躡追捕番賊情急或鳧水過河或騎牛淌渡比及中流率皆淹沒生擒番賊噶布古等十六名蒙古都噶爾男女三名認出乙旦木屍

身割取首級棉甲解驗初十日追至駱駝灘盡  
數殲除現帶官兵赴雪山進剿

二十六日具

奏據派護送軍糧之知縣周廷芬守備許伏米兆  
元稟稱帶兵行至措爾濟探有番賊數十人潛  
匿溝內該員等當率兵前往剿捕賊放槍抵拒  
隨用槍礮轟擊殲斃十餘人追殺二十餘人副  
將丁永安游擊劉印景等於十九日巳刻帶兵  
趕至扎素徹朗遇賊接仗槍礮齊發殲斃三十

餘人賊卽翻山逃走我兵緊躡追剿殺死十餘人餘賊佔據山梁拾石擲打我兵奮勇直上盡數殲除擒獲活賊策卜旦沙拉布鄂冲三名提督齊慎總兵馬騰龍穆蘭岱多隆武探明雪山陡險馬難行走率同副將叅將等分兵四路裹帶乾糧二十二日步行進剿次日午刻齊抵該處番賊望見官兵卽向黃河狂奔沿路落巖並被我兵追及殲斃者不計其數賊衆情急鳧水過河中流率皆淹斃雪山一帶實已肅清此外



河北別無成股賊蹤

硃批欣慰覽之卽有恩旨欽此

五月初九日奉

上諭青海口外野番抗不回巢官兵奮力追剿屢獲  
勝仗該野番分竄雪山長齡督飭鎮將不避艱險  
入山搜捕盡數殲除迅速藏功甚爲可嘉允宜渥  
沛恩施長齡著加恩賞戴雙眼花翎交部從優議  
敘並親書御製詩扇一柄賞賜用昭優眷欽此恭

錄

御製詩

優霑竟夜復侵晨天錫康年惠兆民溜掛虛檐風乍  
爽泉飛古木韻偏真乘時洗甲還滋穀伏願驅炎更  
淨塵恰值西陲馳捷報綏藩殄暴獎勲臣

養心殿對雨恰值陝甘總督長齡勦辦逆番歲事  
詩以誌喜卽書之扇頭賜之

十二日具

奏提督齊慎等報稱派員排比搜捕實無持械抗  
拒之賊惟深山窮谷內藏匿野番或七八人或

十數人訊係陸續偷過黃河牧放牲畜並未搶劫蒙古財物本欲回巢被各族頭目挾制隨行經官兵打散什物丟盡逃在山中躲避等情臣恐其中尙有真賊藉詞支飾提解到營逐加親訊堅供四川番子漢人時來時往以布疋茶葉等物易換羊馬向不久住聞大兵到早已逃走我們都沒隨同搶掠打仗衆供僉同查該野番男女大小共七百六十三名口隨派員帶兵押令在黃河以南妥爲安插據該王公等回稱黃

河以北實無遺留野番聯名出具印結前來計  
自出口進剿甫經兩月將蘊依等二十三族野  
番抗拒者盡數誡俘逼脅者咸從寬貸蒙古從  
茲復業邊氓均可乂安

二十六日奉

上諭長齡等奏番賊悉數殲除青海全就肅清此時  
須將善後事宜籌畫周妥當計及久遠詳慎定議  
俾邊圉永臻安謐方爲不負委任欽此

同日奉

上諭青海蒙古素本怯懦不能自固藩籬以致該番族心生覬覦肆其剽掠屢經官兵代爲擒捕著長齡等再行通諭青海蒙古王公扎薩克等以爾等部落列入版圖以來世受天朝渥恩豢養生成因爾等不能自振每遇番族滋擾輒調集官兵驅逐懲創不惜重費帑金爲爾等曲加保護現因剛咱等族野番盤踞搶掠業經痛加勦除並將所獲牛羊牲畜交爾等分領俾資生計嗣後當知感知奮勉思保衛並當於屬下之人優加體恤使之各饒

生計嚴行管束務令各守法律永承恩澤如仍不知奮勵再有番賊擾及之事豈能常調官兵辦理爾等將何以自爲捍衛耶如此剴切曉諭俾蒙古等漸知奮勉自強邊圉永臻安謐方爲妥善欽此遵卽通行曉諭

六月初三日具

奏竊

臣

等至察漢諾們罕游牧處所黃河以北全

就肅清隨傳集貝勒特里巴勒珠爾等六旗諭令各歸原牧該貝勒等僉稱人少勢孤無力自

衛具呈繳還原賞牧地並據河北各蒙古王公  
臺吉以情願分讓游牧地方給六旗蒙古居住  
互相保衛公具印結前來查河北蒙古二十五  
旗內察漢諾們罕較爲富强阿里克大百戶原  
在克克烏蘇住牧擬令察漢諾們罕移居助勒  
蓋阿里克大百戶飭回克克烏蘇各給執照俾  
垂永久每歲河水結凍後責令分段防守該諾  
們罕等均各樂從其向年會哨之兵應請停止  
並飭令察漢諾們罕阿里克大百戶等各率所

屬迅速移往臣等於五月二十六日回至西寧

公同籌議善後章程八條

一蒙古宜體恤屬下以期庶富

一蒙古宜正其衣冠以防詭混

一蒙番宜嚴查歇家以清盜源

一蒙古宜急籌生計以免流離

一野番宜嚴禁渡河以靖邊圉

一野番宜選立頭目以資約束

一野番宜墾田地以裕生計



一番地應嚴禁硝黃以重軍火奉

上諭俱著照所請行欽此

初九日回至蘭州省

二十日奉

旨補授閱兵大臣

二十六日奉

旨補授大學士

二十八日

奏謝領到

欽定新疆識略一部

同日具

奏督標五營並城守營操練章程請定爲每月中  
左右三營雙日操槍單日操箭前後兩營及城  
守營單日操槍雙日操箭每逢十日合操大隊  
陣式演打大礮一次並於六營專設矛手步隊  
間日操演選擇熟習行陣而善走者令習長矛  
行知各提鎮一體加操咸成勁旅以期得力

七月初七日

奏謝遵

旨俟那彥成接署後卽交卸起程進京供職奉

硃批本月二十日已有旨暫緩來京卿候旨施行可  
也欽此

同日具

奏甘省地當孔道差務殷繁各州縣每年攤捐款  
項勢所必需請於司庫存貯草價項內提銀八  
萬兩兵餉建曠項內提銀十二萬兩以十萬兩  
交甘肅藩司十萬兩解交陝西藩司均各發商

生息所得息銀一半歸還原款一半爲苦瘠州縣攤捐公用俟原款盡數提還後每年所得息銀二萬兩卽作爲通省攤捐公用之費所有收支領項毋庸報部查核奉

上諭自應酌籌調濟著照所請欽此

二十七日具

奏野番一千數百人復過河北搶劫牲畜並殺傷男婦數十人察漢諾們罕不能抵禦亟須另籌防河事宜臣於二十九日前往西寧相機趕辦

奉

上諭著卽督兵妥速勦辦迅就肅清等因欽此

八月十七日具

奏馳抵西寧挑備官兵二千一百餘員名卽日起  
程探知野番聽聞大兵到來均已折竄河南游  
牧處所已無賊蹤惟青海東北間有乘機搶掠  
該鎮穆蘭岱等督兵搜捕數日卽可撤回惟野  
番情同狐鼠茲雖望風逃竄若撤師後又復過  
河滋擾殊屬不成事體請於沿邊扼要營汛分

添馬步兵二千名以資防勦

九月十三日具

奏靈州靜寧渭源靖遠西寧碾伯六州縣收成歉薄請將新舊錢糧草束緩徵又河州被災較重請依急賑之例速加撫卹

同日

奏謝授爲文華殿大學士奉

硃批已有旨諭卿來京供職矣欽此

同日交卸陝甘總督印務

十六日起程進京行至平定州接奉

上諭前因青海野番滋事特令長齡帶兵督辦黃河  
以北全就肅清甫經兩月番賊復過河搶掠辦理  
不善咎無可辭著摘去雙眼花翎准戴單眼花翎  
仍交部議處欽此

十月奉

旨補授鑲白旗漢軍都統

又奉

旨管理理藩院事務

十一月初一日到京

召見蒙

賞紫禁城騎馬

署理正黃旗領侍衛內大臣

十六日

冊封

皇后

命長齡爲副使

三年癸未六十六歲



正月二十五日奉

旨長齡著在軍機大臣上行走

二月充

經筵講官

四月初三日奉

旨管理戶部三庫事務充

上書房總詣達

殿試讀卷大臣

四年甲申六十七歲

正月

御賜大清會典全部

三月

御賜

御製養正書屋詩文集全部

十一月奉

旨管理稽察欽奉

上諭事件處

十二月二十一日奉

旨以大學士補授雲貴總督

陛辭出都

是年子桂輪陞頭等侍衛授

尙茶正

五年乙酉六十八歲

三月自鎮遠一路順閱貴州撫標各提鎮營伍

四月初三日行抵板橋驛接受雲貴總督關防

初六日

奏謝

京察議敘

十六日校閱省標營伍

六月二十四日會同巡撫韓公克均具

奏據緬甸國王派大頭目帶領緬子人等護送車里土司刁繩武及土弁刁燦星自阿瓦起程由新街一路進關到省臣等查該土司前被緬目所誘毫無主張輒卽隨往實屬不合惟覺起奸夷挾嫌播弄又以叔姪夙嫌心生疑慮復因緬國有事不遑送回尙非有意逗留該土司年力

正壯人尙明白暹羅戛于臘南掌緬甸蠻觸相  
爭事所時有刀繩武素於兩國輯睦其近支實  
無可承襲之人應仍飭令回任以觀後效並諭  
慎厥職守以固藩籬該土司深知感愧至刁太  
康如可招致與之釋嫌使叔姪敦睦如初卽可  
免滋費端

九月二十二日接准部咨奉

旨調補陝甘總督

二十六日交卸起程由黔蜀一路遵

旨馳驛前往陝甘

十一月初五日途次廣元縣接奉

廷寄著署理伊犁將軍馳驛前往具摺謝

恩奉

硃批邊疆遠闊事關緊要非卿署理不可卿其善體  
朕心勤慎辦理以副委任欽此

同日奉

上諭現在喀什噶爾事務緊要亟須慶祥前往籌辦  
張格爾與汰劣克在托古斯托羅地方游奕盤踞

一切辦理機宜務須豫爲籌畫長齡熟悉邊疆情形此事必有所見卽當札致慶祥妥協籌辦計出萬全等因欽此

同日奉

上諭長齡著以大學士補授伊犁將軍以專責成欽此

是年子桂輪陞授奉宸院卿

姪桂芬由理藩院員外郎授福建建寧府知府  
六年丙戌六十九歲

二月初十日抵伊犁接印任事

同日

奏謝

恩賞福字壽字

五月初二日具

奏喀什噶爾現有軍需事件本年查閱察哈爾游牧官馬及哈什演圍派領隊大臣祥雲保代辦

六月初三日

奏謝



恩賞錠子藥

同日會

奏北路運銷新疆茶筋如白毫武彝珠蘭香片大  
葉普洱等細茶每百筋定稅銀一兩安化茶湖  
廣益茶小瓢茶每百筋定稅銀六錢其大瓢茶  
每百筋定稅銀三錢與各關稅則例相倣儘收  
儘解試行三年再爲定額如有私帶附茶者以  
私論罪胥吏人等如有紛擾亦卽嚴懲仍按季  
報核

二十六日由六百里加緊具

奏接據喀什噶爾叅贊大臣慶祥札稱逆裔張格爾率領安集延布魯特五百餘人於六月十四日由伊斯里克圖舒克塔什兩卡倫開齊山路突進並附逆回子數百人與官兵接仗又接英吉沙爾領隊大臣蘇倫保咨稱喀什噶爾現被張格爾圍困回賊衆多又接葉爾羌辦事大臣音登額咨稱哈拉塔克等處軍台有布魯特五六十人執持刀槍滋事聞信之下萬分焦灼當

卽揀派官兵二千名飭領隊大臣碩隆武祥雲  
保帶領由冰嶺行走一面飛咨烏魯木齊都統  
英惠調兵四千名令提督達凌阿帶領前往至  
糧餉一項查鎮迪道庫有備貯銀十萬兩咨明  
酌撥再臣本應親身帶兵星夜往援惟各處軍  
台被賊匪侵佔回衆或有煽惑情事業已札飭  
各處密爲防範不可稍涉張皇查伊犁尙有屯  
種回子六千戶且布魯特由那林一路至伊犁  
相距又復密邇地方緊要是以臣暫爲駐守調

遣不敢遠離再哈密爲新疆咽喉屯居回戶亦多必須重兵駐劄可否

簡放大員馳赴哈密督同辦理以便彈壓策應奉上諭所見甚是惟當飛飭各城加意防範以待大兵雲集毋稍疎虞等因欽此

二十八日具

奏接蘇倫保信稱叅將吳亨佑帶兵行至單板橋地方遇賊抵敵該官兵及庫森塔斯渾軍台弁兵全行陣歿現在賊匪約有數萬大小道路俱

被阻斷喀城音信不通英吉沙爾官兵不敷截  
勦咨調喀喇沙爾土爾扈特和碩特兵三四千  
名星馳救援臣查該處被圍危急實爲可慮惟  
土爾扈特和碩特蒙古兵從前乾隆年間西藏  
軍興曾經告往未准今逆回滋事適當夏令該  
蒙古散處山內游牧一時不能齊集現在回逆  
衆多斷非此項蒙古所能勦辦倘有傷亡情事  
轉費周章於事無益應請停止再此次軍務緊  
要請

派令德英阿星速前來伊犁補授叅贊大臣商同督辦奉

上諭土爾扈特和碩特官兵難期得力所見與朕意相同已有旨停其調遣至請簡派伊犁叅贊大臣一員所見甚是已另降諭旨補放矣等因欽此

三十日具

奏接據長清信稱西路各軍台均被逆回梗阻倘賊匪竄入煽惑難以撲滅現會奏調土爾扈特和碩特兩處游牧兵四五千名前往應援等因

臣復思現當南路軍需喫緊之時土爾扈特等雖不能得力亦可稍壯聲勢臣不敢拘泥前奏固執已見卽用蒙古字札諭行知該盟長策伯克扎布等詢其是否情願報効自行湊集蒙古兵數千名令巴哈布帶領由阿爾通霍什卡倫取道前進又沙雅爾阿奇木伯克伊薩克稟懇情願帶領回兵二百五十名前往助援再糧餉急須籌備懇請

勅諭陝甘總督先撥銀十萬兩迅解備支再本日阿

克蘇遞到慶祥六月十三日專差外委索文稟  
稱張逆由岳坡爾湖河色爾布依一帶糾合白  
帽回子搶奪軍台道路不通謹將該外委所稟  
情形據實具奏奉

上諭該將軍統轄新疆雖未躬歷行間亦有總統之  
責凡各路軍情及一切軍火糧餉馬匹等項事宜  
均須通盤籌畫計議周詳如有應行調遣籌備卽  
當一面奏聞一面相機妥辦無致稍有延誤朕亦  
不爲遙制等因欽此



七月十一日具

奏接長清咨稱有錫伯營總管額爾古倫等自喀什噶爾差領催奇車布等到阿克蘇報稱六月二十二日該處接仗烏凌阿穆克登布均受傷陣歿官兵在城外兩不相顧又貿易民人張春等稱葉爾羌十四軍台回子均皆叛亂等語是刻下喀什噶爾圍困愈急恐難拒守查喀什噶爾葉爾羌爲當時回首波羅泥都霍集占踞守巢穴此二處被賊佔據斷非六千兵力遂能克

復惟有奏懇速發大兵四萬經費數百萬兩

簡派統領大臣二三員巴圖魯侍衛數十員倣照乾隆年間用兵分路進剿方能於事有裨

同日具

奏接閱額爾古倫來稟賊匪已將喀什噶爾城門自外堵砌日夜攻逼城中火起其勢定不能存又前據張春稟報各台回子拆橋傷害兵丁伏匿賊匪等事派查均係實在情形阿克蘇爲回疆適中最要之區所關甚鉅應令齊慎往赴阿

克蘇防守冀可安定此五城回衆之心以顧全局而壯震懾又額爾古倫等官兵六百九十餘員名懇

恩准其帶罪自贖又阿克蘇阿奇木員缺請令伊薩克署理再烏什距阿克蘇甚近臣已札知慶廉先運兩月口糧嗣後陸續接濟奉

上諭所奏是一切事宜惟當竭誠盡智隨時相機妥辦朕委心任用不爲遙制該將軍亦勿恤人言稍存顧慮也欽此

十四日具

奏喀什噶爾英吉沙爾兩城均爲賊匪佔據而葉爾羌和闐兩城回衆尙無他變已派官兵從阿克蘇草地行走徑赴和闐繞至葉爾羌救援

二十二日具

奏據阿克蘇咨報和闐各軍台亦被賊匪侵佔漸逼城垣葉爾羌文報不通又巴爾楚克地方有賊匪數千在彼伏匿葉爾羌城池已於六月二十八日失守又據探報賊匪已竄入渾巴什軍

台此時惟有保守阿克蘇烏什兩城以扼南北  
總路已飛札長清囑其先將伊犁官兵酌量分  
派要隘防剿

八月初七日具

奏各省遣犯已入民籍者紛紛呈請情願出征報  
効臣已挑選一二千名設立隊目馳赴阿克蘇  
作爲前敵奉

上諭著照所請行等因欽此

十四日接奉七月二十四日

上諭回疆逆裔張格爾潛謀煽惑命將出師事權宜  
歸統一大學士伊犁將軍長齡公忠體國老成諳  
練著授爲揚威將軍並由京頒給印信軍營大小  
官員悉聽節制武隆阿與楊遇春俱叅贊軍務如  
有續行添調官兵之處著一面奏聞一面飛調該  
將軍等務當合力同心善體朕意恩威並用尙其  
迅奏膚功綏靖邊域用副朕鋤逆安良至意具摺

謝

恩奉

硃批惟願軍行順利迅奏膚功欽此

十五日具

奏查阿克蘇烏什庫車現駐官兵六千名土爾扈特蒙古兵一千名又各處換防及額爾古倫退回官兵一千五百餘名合之楊遇春請調官兵五千五百名齊慎所帶官兵三千名吉林索倫官兵二千名通共一萬九千餘名將來分兵進剿接續後路以及安設軍台遞送文報滾運糧餉等事不敷分撥

臣

已札覆慶山調用成都駐

防滿兵二千名並飛咨楊遇春再調撥綠營兵  
一萬名臣再於伊犁民遣挑選一千名通計前  
後所調官兵三萬二千餘名計可敷用至需用  
馬匹伊犁兩次調用八千餘匹已咨會彥德於  
塔爾巴哈台官廠牧馬挑取五千匹趕赴阿克  
蘇以備騎用再接長清信稱和闐滿城已於七  
月二十日被賊攻破臣已飛札囑將草地一路  
添兵嚴加防守

十九日具



奏喀什噶爾英吉沙爾葉爾羌和闐四城俱已失  
守阿克蘇爲第一關鍵最要之區必須照向例  
預籌官兵一二月口糧庶於臨時無誤餉銀一  
項亦必須先撥三四十萬兩運貯備支

二十八日

奏報仍用伊犁將軍印信起程由那拉特卡倫草  
地行走

同日具

奏據長清派叅將存柱將邁哈默特鄂對押解前

來臣隨於途次訊問據邁哈默特鄂對供稱張格爾攻破回城時若不順從必然殺害是以情願投順隨後張格爾叫回阿克蘇糾約造反遂俱應允張格爾派來押送的阿渾要探官兵實信遂用紙條書寫伊犁烏魯木齊派來官兵八千一二日內可到現被拏獲不能替和卓糾約數語實係一時糊塗貪生求命復訊據伯克回子僉供該伯克畏死情真實無糾約謀叛之事並據邁哈默特鄂對痛哭碰頭必欲商同伊薩

克設法生擒張格爾以圖報効似出至誠至所  
遺貝子世職遵

旨卽令伊薩克承襲奉

上諭邁哈默特鄂對祇係畏死倖生其給張逆信如  
果屬實乃哄騙張格爾之意但事後如此供吐亦  
未可盡信惟當用人之際祇可貸其一死倘能愧  
懼圖功尚可許以自新仍須密加防範等因欽此  
九月初三日奉到八月初八日

硃諭一爲將帥者貴在賞罰公當號令嚴明一進兵

後當其攻城對敵之時必應一力勦殺一大軍進  
勦凡設卡安營必就水草之地然路徑生疎逆回  
奸詐百出竊恐於上流暗施毒物務要飭知留心  
防範一派領隊大臣巴圖魯侍衛以及健銳火器  
二營吉林黑龍江官兵等必須調撥壯實馬匹俾  
無缺乏之方可得用一行軍利器遠則鳥槍近則弓  
箭爲要一新疆礮位未知可否適用亦當早爲籌  
辦一大兵雲集之後已值氣候嚴寒禦寒之具亦  
應妥辦一各城大小伯克如能實心出力者必當

立加褒獎收以夷制夷之效一分路進兵總要差探路徑聲息相通一逆裔張格爾巴布頂等務要設法擒獲爾將軍等其同心合力佐朕成此大功竚望捷音之至一力慎勉爲之等因欽此

十六日繞出喀喇沙爾大道

十九日喀喇布拉克途次具

奏籌撥進兵後運腳經費銀兩

十月初一日抵阿克蘇

十一日具

奏密令伊薩克等遣人先赴布魯特等處作爲伊等之意通示卡外許給銀物幫同截拏如能擒獲張格爾一體封賞奉

上諭果能如是實爲極好機會但須加意慎重不可惜費亦不可墮賊奸計欽此

十六日具

奏據兵丁閻義供稱張格爾瓜子面紫黑色鼻梁上有些微麻三結鬚中等身材約三十餘歲質之邁哈默特鄂對僉稱相符其有無子女家屬

現在何處則相傳不一又聞其現被浩罕拘禁  
亦難遽信

十九日具

奏柯爾坪距阿克蘇三百餘里節次探聞賊匪在  
該處南北兩莊屯聚隨派固原提督楊芳率將  
備前往至和色爾湖十四日亥刻東面後路有  
賊潛襲分遣官兵迎擊殺賊三十餘名生擒托  
和塔什餘衆四散卽向柯爾坪進發十五日卯  
刻攻撲南莊北莊分投擊殺賊勢兇勇副將胡

超下馬持矛身先步戰立斃賊匪數人短兵相接殺戮過半兩路會合夾擊生擒七十三名於賊屍中據活賊認出首逆約勒達什伊瞞玉努斯若依木托胡坦等首級

上諭長齡等奏柯爾坪回莊逆賊剿洗淨盡覽奏嘉悅長齡楊遇春初到軍營卽獲勝仗已褫逆酋之魄此皆該將軍等韜畧嫺熟兵將一心督率有方所向克捷著賞給長齡四喜白玉搬指一個嵌寶石小刀一把珊瑚豆大荷包一對小荷包兩對等



因欽此

二十六日具

奏會商滿漢進征官兵以到阿克蘇之日爲始無論馬步守兵每名月支鹽菜銀一兩四錢五分滿兵每名連跟役照定例月支鹽菜銀一兩七錢五分仍各日支口糧麪一斤其騎馱馬匹每騎日支乾銀五分每馱一隻日給僱價銀一錢其運送軍需大路以七十里爲一站旁道以四十里爲一站又

奏籌撥伊犁存貯糧石由冰嶺轉運阿克蘇以資接濟

十一月二十二日

奏請賞給先行出口兵丁每名皮衣皮帽銀二兩令其自行製備

同日

奏謝祇領叅贊大臣武隆阿齋到

恩賞

御用線緞袍褂料各一端套袖料二副裙料一件

二十七日具

奏派撥官兵前赴烏什巡防

十二月初一日容安桂輪齋到

欽頒揚威將軍印信一顆並

恩賜護身

佛一尊

御用荷包二個火鑷一件具摺

奏謝奉

硃批卿同兩叅贊大臣務要合力同心早擒逆首恢

復四城速建大勲共膺懋賞朕佇望捷音之至也

欽此又於摺內復蒙

勅令臣之子桂輪効力行間句旁奉

硃批鋒鏑之下不可妄遣朕以卿年近七旬特命伊  
隨侍左右兼可練習也欽此

初二日欽奉

諭旨邊外天氣沍寒朕心實深廕注特賞長齡黃裏  
貂尾馬褂一件並賞獺皮戰裙一條以昭眷注等  
因欽此

二十八日

奏請進征每兵一名馬一匹日給料三倉升官員  
按照例馬減半給料隨營糧員供支

同日

奏報和闐回衆縛解賊目約霍普等七名來營投  
誠

是年子桂輪奉

命赴喀什噶爾聽候差遣委用陞內閣學士兼禮部  
侍郎

姪桂斌於正月授爲和闐辦事大臣六月抵任  
殉難捐軀蒙

恩照都統例賜卹經兵部議桂斌原有二等男今給  
騎都尉應歸併爲一等男兼一雲騎尉姪孫麟  
綬承襲桂斌長子

七年丁亥七十歲

正月十九日會

奏派兵進紮巴爾楚克地方以牽賊勢而備進剿  
並選派回目愛孜木沙齋諭密赴葉爾羌相機

用間布賞宣威設法妥辦

二月初五日

奏謝領到

賞賜福字壽字荷包銀錢銀鏢食物

同日會

奏前奉

諭旨應分正奇兩路俾牽賊勢而免竄逸

臣等節次

查探道路情形自烏什卡倫以外直抵巴爾昌  
均係險窄山溝且有數站戈壁並無水草加以

山石錯雜馬隊難行後路兵糧尤艱跟運查初  
定回疆時曾因烏什卡外赴喀什噶爾水少石  
多有碍進征合之現探情形正復無異且卡外  
各部落亦大半皆爲張逆煽惑勾通未可以一  
軍深入如以兩路分進相距二十餘站聲息難  
通倘一路稍有阻滯卽於全局大有關係臣等  
審度機宜酌量兵力必須歸併一路改由中道  
出其不料突往圍攻庶可反正爲奇易於得手  
現在籌計已定武隆阿統領滿漢官兵作爲前



敵仍分兩隊以便兜截抄擊臣偕楊遇春統領  
滿漢官兵亦平分兩隊應後接前擇期於二  
月初六日徑由樹窩子一路先將從逆各回莊順  
道掃除廓清後路一俟馳抵喀什噶爾卽當併  
力圍攻計擒首逆奉

上諭所見甚是行軍之道移步換形原在該將軍等  
審勢相機妥辦務保萬全惟兵貴神速必須掩其  
不備剋日圍攻旣足以振軍威而褫賊魄且使逆  
裔無竄逸之暇方爲妥善總趁此天日融和於三

四月間一鼓蕲功方爲不負委任竚望捷音之至也等因欽此

二十四日會

奏臣等由樹窩子取路進發二十二日行抵大河拐割營三更後賊匪潛襲官兵槍礮齊發時逾四鼓賊始竄逸迨至黎明查點賊屍擊斃甚衆一面整旅前進沿途均被賊匪決放河水並挖深溝高坎意圖阻滯官兵午刻行距洋阿爾巴特莊十餘里西南沙岡橫長六七里賊匪憑高

排列約計二萬餘人臣督率滿漢官兵由中路

迎擊楊遇春由左手抄截武隆阿由右手抄截

賊見三路撲殺突下沙岡分投迎拒我兵撲近

攻擊刀矛競進賊復奔聚沙岡希圖全力下壓

臣等隨於三路之中又分數股官兵不避鋒刃

搶上沙岡槍箭所至賊勢披靡臣督中路官兵

趕向回莊圍攻勦洗淨盡楊遇春武隆阿跟蹤

追殺直至排子巴特賊已殲斃無遺統計殺賊

萬餘名生擒活賊三千三百餘名奪獲旗幟器

械馬匹無算卽於二十五日拔營前進奉

上諭長齡等奏官兵進剿大獲勝仗現督兵抄截賊  
巢覽奏嘉悅之至該將軍等勛勤懋著忠勇可嘉  
長齡著晉加太子太保並賞給御用喜字玉搬指  
一個黃辨珊瑚豆大荷包一對小荷包四個仍交  
部從優議敘等因欽此

二十六日會

奏臣等於二十五日仍分三隊行距沙布都爾莊  
十餘里遙見賊匪臨渠排列不下十餘萬莊後

林中均有伏匿並將渠水放淹田路刨挖坎坑  
臣偕楊遇春督率步兵居中馬隊繼後各分五  
行按隊而進騎賊突衝迎誘復據險施放槍礮  
我兵用連環槍礮轟擊不避渠水淺深飛身渡  
越短刃相接馬隊由左右淺渠抄截賊匪難支  
賊目猶馳騁擊鼓官兵馬隊橫截入陣槍箭如  
雨立斃執旗賊匪並擊鼓賊目奪獲賊馬鳥槍  
鐵甲衆始潰散臣等以賊勢過衆旣經得手必  
須痛加進剿當令分投掩殺逼至渾水河邊躡

水追殺三四十里擒戮殆盡正在小憇西北林  
內塵土衝起突有援賊數千隱約前來復督率  
大隊趕往迎勦河西又有馬步賊匪二千餘衆  
拆橋抗拒官兵用大礮轟擊餘賊分竄本日兩  
次接仗人人奮勇擒戮不下四五萬人賊膽已  
寒兵氣倍壯奉

上諭長齡等奏官兵續獲勝仗覽奏欣悅之至該將  
軍等懋著勲勤實堪嘉獎長齡著賞給白玉吉祥  
如意牌一面珠鑲寶石帶版一副白玉鼻烟壺一

個鑲寶石小刀一把此次著再加恩交部從優議敘等因欽此

二十九日會

奏<sub>臣</sub>等於沙布都爾莊拔營搜剿回莊零匪訊據

賊供阿瓦巴特回莊依岡背河樹林環密張格

爾派有十餘萬人在彼迎拒<sub>臣</sub>等遣人躡出通

該莊僻路二十八日五鼓先派哈朗阿帶領馬

隊由左抄往阿勒罕保由右抄往大兵由大路

前進辰刻行距該莊八九里許賊衆排列岡上

形如雁翅卽督令步兵居中馬兵分爲兩翼橫  
排齊進槍礮並施賊衆佯退臣等卽令步兵以  
連環槍礮隨放隨進並乘風施放噴筒烟迷賊  
目騎賊盲烟衝壓臣等復令虎衣虎帽民遣躍  
舞籐牌直前砍殺賊衆馬驚陣亂岡後突有紅  
衣賊目率賊援應正在支拒間哈朗阿帶兵從  
後掩至賊衆紛紛潰敗大兵乘勢搶過沙岡斃  
賊二三萬衆生擒二千餘名追至洋達瑪河邊  
餘賊遠竄隨將沿河一帶回莊搜勦淨盡奉



卷三  
上諭逆匪膽敢糾合餘燼在阿瓦巴特回莊負隅抗  
拒經長齡等先派左右兜剿卽督令馬步分兩翼  
齊進奮勇掩殺搜剿淨盡該將軍等懋著勲勤深  
堪嘉獎長齡著加恩先賞紫韁等因欽此

同日奉

上諭長齡等奏稱賊匪節次據險迎拒詭譎百出官  
兵現距喀什噶爾僅七八十里中隔七里河一道  
沿途均有匪黨防備自應謀而後進所見極是行  
軍制勝之道總須謀出萬全該將軍等忠勇素著

此時諒已掃穴擒渠朕惟計日以俟捷音之至等  
因欽此

三月初二日會

奏臣等二十九日督兵行抵渾河沿北岸賊匪憑  
河列陣積厚十餘層橫長二十餘里挖掘深溝  
疊築土岡約長三百餘丈岡上築成空穴卽於  
穴中放礮聲欲騰空子落如雨我兵雖用連環  
大礮轟擊俱格於土岡不能斃賊賊勢益張夾  
岸相持時已薄暮我兵就岸劄營而賊竟由東

面躍淺渡河直奔左軍營壘經官兵登時擊退  
維時天已昏黑賊陣礮聲愈緊三鼓後西南風  
陡起撼木揚沙臣等竊計賊衆兵寡驟難得手  
惟有乘此風勢潛渡上游使賊匪猝不及防方  
能出奇制勝將曙先遣馬兵於沿河下游作欲  
渡之勢臣等督同馬步官兵潛赴上游乘勢躍  
渡併力突撲賊衆死拒我兵不避矢石奮勇衝  
壓賊始奔逸臣等親率官兵由破城子一帶疾  
馳前進申刻將近喀什噶爾城下賊匪復施放

槍礮抵禦楊遇春帶領馬步各隊搶據回城東北要隘武隆阿帶領馬步各隊先將漢城攻克據其北面臣督催官兵攻堵四隅城上紅衣賊目托里和卓安集延大頭目推里罕及其姪薩木汗從逆伯克阿布都拉卽趙通事率衆抵禦我兵先將阿奇木衙門攻破訊據活賊供稱張逆聞敗卽時竄逸當將張格爾之妻愛則爾畢比等三口巴布頂之子阿里雅爾先後搜獲戊刻將東門攻潰殲斃托哩和卓擒獲推立罕薩

木汗阿布都拉入城安撫並令各隊嚴密防堵  
內外搜查奉

上諭大兵自進剿以來連獲勝仗茲復竭兩晝夜之  
力克復喀什噶爾實爲迅速可喜該將軍等鼓勇  
直前將士人人效命固堪嘉獎惟張逆勢窮竄逸  
早在朕意料之中屢經飭諭設法堵截防其潛遁  
不啻至再至三乃兵臨城下功在垂成猶令逆裔  
乘間竄逸殊失朕望該將軍等務卽嚴密兜截迅  
速掩捕勿得再任遠颺等因欽此

初七日會

奏連日派兵於喀什噶爾城內暨各回莊逐細搜查陸續拏獲賊目阿布都勒依木一百六十三名詰以張逆蹤跡僉供不知復向推里汗等究訊據供張格爾有逃赴英吉沙爾葉爾羌之言楊遇春武隆阿前往行距英吉沙爾五十餘里地方卽有黑帽回子阿布都瓦依提等迎接投誠訊知張格爾並未逃往該城奉

上諭官軍收復英吉沙爾張逆尙無實在蹤跡長齡

等未能仰體朕宵旰憂勤之意致有疎縱辦理不善自應加以懲創著革去紫韁等因欽此

四月初二日會

奏

臣

等派阿布都爾滿赴葉爾羌查探情形楊遇

春行抵倭巴地方據阿布都爾滿帶領葉爾羌大小阿渾伯克縛獻賊目烏舒爾巴凱等並交出軍械車馬火藥懇乞投誠當卽研詰張逆下落據稱並未前來楊遇春帶領官兵入城收撫

奉

上諭長齡等奏收復葉爾羌派兵駐劄防守布置俱極妥協自應趁此聲威查探張格爾蹤跡務期必獲迅速戴功等因欽此

十二日會

奏前因和闐尙有賊匪盤踞派令提督楊芳帶領官兵前往勦辦茲據報稱行至雜古牙爾賊匪直前拒敵馬步隊四路夾擊奮勇衝殺將花衣賊目噶爾勒擒獲乘勢力撲賊衆潰奔追殺二十餘里二十九日舊時伯克帶領回衆迎接官



兵入城安撫奉

上諭和闐回衆前已將賊首約霍普縛獻投誠逆裔  
張格爾復差賊目噶爾勒玉努斯帶領安集延並  
情蘭回子在彼盤踞又糾約無賴回子三千餘名  
抵死抗拒官兵勦辦和闐全復其拏獲賊目究係  
何人首功著該將軍等確查具奏等因欽此

二十二日會

奏酌帶官兵出卡相機督捕並飛諭汰劣克阿坦  
台各部落趕緊擒獻張逆

五月初七日會

奏拏獲探信賊匪根究張逆竄蹤現派官兵馳往  
掩捕並將訊明張逆之妻愛則爾畢比三名均  
係入卡後招納現已遵

旨正法巴布頂之子阿里雅爾現派副都統容安小  
心押解進京

同日具

奏請將挑帶伊犁隨征出力遣犯悉予免罪釋回  
十四日會

奏據報跟捕首逆潛匿木吉地方派兵出卡相機  
掩捕並擒獲逆夷布魯特比庫圖魯克等七名  
訊明正法奉

硃批逆首尙未就獲朕心焉能稍釋等因欽此

同日

奏謝領到

恩賞平安丸散錠子藥

十四日會

奏軍營大局已定請將各官兵陸續凱撤

閏五月二十四日會

奏探聞張逆差人赴達爾瓦斯部落借兵當卽揀  
派官兵先將拉克沙深河鐵索浮橋拆毀卽行  
掩捕並據卡外回夷各部落遣人來營納款奉  
硃批布置尙屬周密朕惟日夜竚望馳奏紅旗等因  
欽此

同日具

奏浩罕伯克邁瑪達里遣使來營納款

六月十三日會

奏將八城應徵上年本年糧石貢賦各項普爾錢  
豁免刊刻謄黃曉諭

二十七日會

奏喀拉提錦布魯特比來管効順並飛催官兵馳  
赴什克南設法擒拏張逆

七月十八日會

奏提督楊芳營次搭里克打板有馬步賊匪二千  
餘人由山溝內竄出當卽迎擊安福身受槍傷  
嗣經官兵擊斃紅衣賊目三名次日黎明官兵

分路進攻斬擒一千五六百人逃脫者不過百餘人提督楊芳帶兵暫扎阿賴相機商辦奉

上諭著交部議處尋蒙

恩旨著從寬改爲革職留任

八月十一日會

奏時值冰雪已大官兵久駐卡外無益隨將什克南拏獲賊目押解回營商辦

九月十三日會

奏籌辦防剿事宜並凱撤各路官兵奉

硃批該逆倘再圖窺伺恐出我不意必向葉爾羌侵犯須隨時查看光景密派偵探切勿墮彼奸計是爲至要等因欽此

十月十九日具

奏四城雖復衆志未定張逆竄至托古斯托羅地方難保不復萌故智冀圖勾結旣當嚴密防備尤應設法誘擒請

旨留營督辦奉

上諭前因各城辦事大臣俱經簡放有人是以降旨

令長齡回京供職旋復令暫緩來京如已起程卽  
趕緊折回喀什噶爾茲據奏請暫留軍營督辦所  
奏甚是長齡著仍遵前旨在喀什噶爾辦理一切  
其揚威將軍印信著留鈐用倘接據卡外探報卽  
速奏聞等因欽此

十二月二十七日會

奏據偵報張格爾於本月十七日帶領賊匪二百  
餘人並阿坦台處布魯特二三百人來至伊里  
斯曼底愛曼附近游奕聞該逆已糾約各愛曼



窮苦布魯特多人於官兵過年時意圖潛進卡  
倫<sub>臣</sub>等先派妥幹回子分往卡外查探情形並  
令各官兵裹帶口糧一聞確信刻卽分路迎剿  
現在卡外天寒雪大官兵未便出卡如該逆果  
於歲底前來設法誘其入卡更可一鼓殲擒  
二十八日督兵出卡

除夕日生擒張格爾於喀爾鐵蓋山

是年子桂輪於十一月自營起程順齋武<sub>公</sub>隆

阿所交叅贊大臣關防回京供職

八年戊子七十一歲

正月初二日會

奏據圖舒克塔什坐卡遠探官兵報稱有騎賊三

百餘人步賊二百餘人向東北奔竄

臣等揆其

情形自係張格爾仍欲由上年入卡舊路糾約

滋事

臣

偕楊芳帶領兩路官兵均向阿爾圖什

前進途次探報張逆由開齊山路潛入阿爾古

回莊少息復向阿爾圖什前來見回衆不肯附

從旋即折竄出卡

臣

在卡劄營五鼓時探得該

逆直奔喀爾鐵蓋山當卽差官持令曉諭各隊官兵竭力追捕楊芳連夜帶兵趕至喀爾鐵蓋山內立斃賊匪二百餘人張逆佔據半山率馬賊三百餘人迎面衝突我兵排槍抵敵人人奮勇馬隊官兵抄及賊後分兩路下壓該匪力不能支卽向山溝竄逸我兵盡力追勦復斃三百餘人張逆僅餘三十餘騎擁護上山胡超伊薩克擒獲賊目依斯拉木素皮察克訊知張逆服色飛騎力追山高路滑衆賊棄馬登山胡超等

帶領官兵回子六七十名亦棄馬直躡窮追斃  
賊五名張逆僅從賊匪十餘名擲石回擊胡超  
等各帶兵追及山巔該逆見勢急將自刎胡超  
段永福錫伯馬甲訥松阿舒興阿兵丁楊發田  
大武等奪刀生擒並賊目八名餘賊勦殺無遺  
時已未正臣聞報以官兵陟山追賊越一晝夜  
甚爲辛勤飭令緩程入卡臣卽先行回營安撫  
回衆謹遵

旨由八百里加緊馳奏紅旗上慰

宸廑並差

乾清門侍衛副都統阿勒罕保星馳赴京代臣等

叩賀

天喜茲於正月初二日巳刻張格爾解至大營派令  
副都御史誠端副都統吉勒通阿祥雲保帶領  
凱撤官兵解送進京定於初六日起程並另具  
賀摺奉

硃批以手加額敬感

天

祖默佑朕大學士揚威將軍長齡終成大功卽沛殊恩  
欽此

同日奉

上諭上年十二月逆裔張格爾欲乘歲除潛入卡倫  
經長齡楊芳分帶官兵趕至喀爾鐵蓋山該逆情  
急將欲自刎胡超等奪刀生擒飛章奏捷元凶就  
縛遺孽剪除洵足以安邊徼而快人心長齡統師  
進剿督率官兵不避艱險於卡外臨陣生擒巨慝  
檻送京師與檄諭外夷設計縛獻者迥不相同其

在事將領官兵等爭先効命自係該將軍等督率  
有方仍當渥沛殊恩用昭懋獎長齡著加恩錫封  
威勇公爵世襲罔替並賞戴寶石帽頂兩團龍補  
服授爲御前大臣賞用紫韁換戴雙眼花翎並解  
賜佩囊二件寶石頂一個雙眼花翎一枝龍補一  
副白玉雙喜翎管一個御用白玉搬指一個白玉  
吉祥如意佩一件黃瓣珊瑚豆大荷包一對小荷  
包四個並開復一切處分等因欽此尋經吏部  
奏請定錫爵等秩得

旨大學士長齡著封爲二等威勇公

恭錄

御製正月二十二日酉刻揚威將軍長齡叅贊大臣  
楊芳由八百里加緊馳奏紅旗報捷於卡外喀爾  
鐵蓋山督率大兵生擒首逆張格爾邊徼肅清大  
功告蒞用成七言六韻以誌欣慶

四城克復已踰年元惡潛逃尙苟延除夕功成意能  
料新春捷報佑從

天圖舒

克

塔什先通信喀爾鐵蓋早據巔盡力窮追超



卡外舍生立獲在軍前揚威

長齡

參贊

楊芳

忠兼勇勁旅

營兵銳更堅震警邊荒安絕域酬庸懋典大勲全

同日具

奏官兵勦賊時

關帝靈佑屢昭紅光再見奉

旨加威顯

同日奉

上諭長齡生擒逆首紅旗報捷克成大功朕忻慶之  
懷莫能名狀現在善後事宜尙須妥爲經理業經

降旨令那彥成馳往並令長齡詳細交代卽行來京展覲等因欽此

二月初七日奉

上諭此次回疆用兵迅復四城生擒大憖凡我將士勞績卓著均應繪成戰圖以彰武成盛典著將渾巴什河柯爾坪洋阿爾巴特沙布都爾莊阿瓦巴特攻克喀什噶爾克復和闐及喀爾鐵蓋山各戰功繪圖八分所有各該處山川形勢及將帥士卒若何督兵若何接仗各情形詳晰聲敘分條貼說

迅速具奏等因欽此

初十日奉

上諭長齡前遣副都統阿勒罕保齎遞賀摺二十二日到京行走甚爲迅速朕詢悉追揜情形深堪嘉悅此次平定回疆生擒逆裔軍務蔽功自應照前成例將在事功臣繪像紫光閣紀實銘勲除長齡楊芳楊遇春武隆阿四人應行列入外其餘戰功最多勞績最著及隨同轉戰各員分別開具銜名詳註事實迅速覆奏等因欽此

二十二日奉

旨頒賞白玉喜象煖手一件

御用大荷包一對小荷包四個

三月初三日自喀什噶爾起程

十五日迎晤那公彥成於阿克蘇面交善後事

宜

十八日起程齎印回京

二十五日奉

上諭長齡著補授正紅旗滿洲都統

同日奉

上諭長齡奏已於三月初三日自喀什噶爾起程回京覽奏欣喜朕專待面晤途次有可趨程之處務卽趕緊行走以紓盼注時已入夏發去御筆書畫詩扇一柄扇袋一個交長齡祇領等因欽此恭錄御製三月二十四日揚威將軍威勇公長齡奏報三月初三日自喀什噶爾起程入覲時已入夏取扇頭寫以墨菊並題四韻賜之

欣聞馬首已旋東與朕同心建大功宣力

三朝清且慎揚威西極勇兼忠瓊樓繪像羣英冠鐵蓋  
垂名衆望崇先道延年昭眷注邊風永靖播仁風

道光戊子季春御筆

四月十三日奉

上諭桂輪馳驛迎赴前途隨同長齡來京並

頒賞珠鑲碧霞弘帶版帶環三件黃辨珊瑚豆大荷

包一對小荷包四個交桂輪齎往嗣於長武途遇

祇領

五月十二日奉

上諭逆裔張格爾自嘉慶二十五年後屢次入卡道  
光六年復勾結回衆搶佔四城天戈所指迅就克  
復該逆乘間逃逸復於上年除夕潛入卡倫希圖  
窺伺經長齡督同楊芳統率將領官兵生擒巨憝  
檻送闕廷本日御午門受俘因念該將軍等先事  
預籌克奏膚功前已懋賞酬庸茲當大禮慶成揚  
威將軍大學士公長齡著加恩晉加太保銜賞戴  
三眼花翎等因欽此恭錄

御製揚威將軍大學士威勇公長齡叅贊大臣果勇

侯楊芳遣派將士等檻送首逆張格爾生致闕下  
於五月十二日御午門受俘禮成用誌七言十二  
韻

迢迢萬里欣生致俯視渠兇面目真驛送縲囚傳月  
竊誠孚大禮享

明禋冥頑梗化稽三代撻伐揚威赫九垓邊外功成欽  
祖佑年除醜獲荷

天仁牽來白組俘當夏馳到紅旗報正春宏壯午門宣  
凱樂綏安西域掃烽塵追擒不有軍前縛執獻能教



卷三  
三  
仗末陳阿古奸回空煽結浩罕狡虜罔交鄰貪殘憶  
昨鴟張日蒲服看茲兎伏身疆場抒忠嘉將士市朝  
紆憤快神人師班飛檄探逋孽解作投荒錮逆姻耆  
定寸衷增惕厲克襄鉅典稟躬親

二十四日奉

上諭揚威將軍大學士公長齡凱旋入覲昨據奏於  
六月初旬可以抵京屆期著派鄭親王烏爾恭阿  
松筠格布舍哈朗阿奕經前往良鄉迎勞所有應  
行典禮該衙門照例妥爲預辦欽此

六月初二日奉

上諭揚威將軍大學士公長齡於初六日行抵良鄉  
已派王大臣迎勞賜茶酒並著內務府派膳房章  
京二員前往頒賞饌筵以昭優眷欽此

初七日奉

硃諭本日長齡親詣御園恭繳揚威將軍印信朕御  
勤政殿行抱見禮見其精神矍鑠重定邊疆生擒  
巨惡朕喜悅嘉獎之心實難備述前已加恩茲當  
凱旋入覲告厥成功允宜再沛恩施用酬偉績長

齡著賜御用珊瑚朝珠一盤四圍龍補袿一件並  
准卽行穿用四圍龍補服用示朕眷念忠勤懋賞  
褒功有加無已之至意特諭

同日奉

上諭揚威將軍大學士公長齡前此奉命專征聲威  
遠播四城迅復巨憝生擒從茲永靖邊陲厥功甚  
鉅朕嘉績酬庸錫封懋賞而外並授爲御前大臣  
以昭榮寵現值振旅還朝必思勉奉厥職惟念長  
齡年逾七旬精神雖健若令照常趨值翊衛奔馳

轉非所以示優異長齡著兼御前大臣不必進內  
侍值並無庸辦理該管事件用示朕體恤耆臣至  
意欽此恭錄

御製六月初七日揚威將軍大學士威勇公長齡至  
京親繳印信御勤政殿行抱見禮詩誌欣慶

乍欣元老功歸日已慶丹樓俘獻年握手開言歡復  
感摠誠抱見禮尤虔親齋虎鈕威西極特寵龍章賜  
四圖長此經邦弼子治安邊勲業汗青傳

六月初九日奉

旨總理理藩院事務

管理

雍和宮咸安宮蒙古官學唐古忒學托忒學事務

二十五日奉

旨管理戶部三庫事務

授爲閱兵大臣總詣達

八月初一日奉

旨補授正黃旗領侍衛內大臣

命充崇文門正監督

初七日

上於正大光明殿凱宴蒙

賞銀五千兩大緞官絀各四十卷

十七日

命充繙譯鄉試正考官

九月初九日扈

蹕自圓明園起程恭謁

東陵

西陵禮成

二十二日回京

十一月十八日七十生辰仰蒙

聖恩賜壽遣內務府大臣達三賁到

御書平格功成匾額一面

御書黃扉贊化星辰近紫閣圖勲創佩高對聯一副

御書功臣像贊一張

恭錄

御製像贊

揚威將軍大學士威勇公長齡

進勦渠兇授將軍印總統王師皤皤英俊欲生生擒  
揚威威震重定新疆褒封宜晉

御書福壽字各一方

御賜

佛一尊玉如意一柄大毛薰貂帽寶石帽頂白玉翎  
管三眼花翎四圍龍補服絳絲蟒袍嵌金帶版寶  
石朝珠大小卷江紬大小荷包陳設九件叩頭祇  
領

十二月二十三日



賜御書平安如意四字

是年子桂輪陞授正白旗漢軍副都統挑

御前侍衛管理

御船處署鑲紅旗護軍統領補鑲白旗護軍統領左

翼查城大臣

媳和舍哩氏卒爲子桂輪續娶原任直隸布政

使素公納之女高佳氏

姪桂芬護送琉球國貢使於十二月自閩到

京